



DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS  
*manè discutienda in Scholis Medicorum, die Jovis vigesimo-primo,  
mensis Martii, anno Domini M. DCC. XLIII.*

M. HYACINTHO - THEODORO BARON, *filio*,  
Doctore Medico, REGIS Exercitûs in Bavariâ  
Medico Primario, Præside.

*An ut sanandis, sic & præcavendis pluribus Morbis Aqua nova Minerale Passiacæ?*

I.



QUA vulgatus nihil, nihil aquâ utilius. Fluidum illud ubique occurrit. Vastissimum ipsi receptaculum præbet Mare. Tenuissimè divisum liberè fluitat in aëre. Ibidem in nubes collectum ventorum obsequitur imperio, in nivem, imbres, grandinem aliquando resolvendum. Montium cacuminibus percolatum ex aëre, specus subit subterraneas. Ex his quâ datâ portâ fontium specie erumpit, rivulorum formâ effluit, sensimque crescens eundo maxima constituit flumina, terrarum tractus ingentes ab origine, ad usque Neptuni sedes peragrantia; disitos ab invicem populos dulci adeo societatis vinculo jungentia, plagis quas alluunt fertilitatem, urbibus quas præterfluunt pulchritudinem, annonam, munditiem inferentia. Aquæ be-

A

neficio Vegetantia aluntur & crescunt, vivunt Animantia vigentque; inanimata corpora vel solidissima illud ab aquâ tenent quod consistant, ejusque tanquam glutine suæ sibi cohæreant particulae. Chymicis ignibus tractata quælibet mixta aquam fundunt copiosam. Potus singulos exactiori subijcias scrutinio, singulorum longè maxima pars phlegma est, singulos appositè nominaveris aquam diversimodè adulteratam. Potentissima artis Spagyrica menstrua suam ab aquâ mutantur energiam, hinc oleum Calcanthi ita exutum phlegmate ut in crystallos coeat impunè tetigeris; hinc illud axioma, falsa non agunt nisi dissoluta. Aquam etsi non universale at saltem princeps Menstruum non immeritò dixeris. Solvendi quâ pollet aqueum elementum virtuti, acceptos debet fortius fontes genus humanum. Enim verò dum Aqua intimos terræ recessus vago cursu perlustrat, Salium diversi generis, Pyritarum, ferreæ indolis Minerarum, Terrarum non unius speciei particulas abradit; indeque medicatas vires maximo ægrorum mortalium commodo sibi arrogat. Tantus est fontium hujusmodi salubrium in toto orbe numerus, ut nulla ferè sit Gens quæ præstanti adeo Nympharum munere non gaudeat. Nec est quod felix supra cæteras telluris plagas Gallia, illud suis incolis parcius concessum esse beneficium conqueri possit. Imò potius est unde ulteriorem vicinis populis invidiam moveant suæ & in hac re divitiæ. 60 ad minimum in hoc florentissimo regno numerantur Aquarum mineralium scaturigines. Ultimam has inter non tenent locum detectæ à 24 circiter annis Acidulæ Passiacæ. Non procul à Lutetiâ Occidentem versùs affurgit collis, tum decurrentibus in infimâ valle Sequanæ aquis, tum gratissimo meridiani Solis aspectu, tum puritate æris, tum Bononiensis sylvæ viciniâ commendabilis. Mons ille amenissimus impositum dorso sustinet vicum ita dictum Passiacum, villulis constantem pluribus elegantissimis, quarum una, ut cæteris seu hortorum late virentium, suaveque olentium ornatisimum cultu, seu camporum late undique patentium pulcherrimo prospectu non inferior, sic & iisdem, salutaris quibus irrigatur totibus longè est superior. Ibi quatuor diversis oculis è terræ sinu prorumpunt totidem jugis aquæ rivi, Marcellitarum quibus totus interior constatur clivus quasque fluendo præterlabuntur spoliis ditissimi. Suus rivo cuilibet proprius est ortus, proprius per montis viscera decursus, propria vis mineralis virtusque medica. Communis est omnibus aqua crystalli instar pellucida, nec ullâ tempestatum vicissitudine obscuranda; sapor omnibus inest terreus, pungens, & quodam modo vinosus; ferreum omnes spirant odorem; omnes aquam fluviatili paulò graviores volvunt. Hi quatuor rivi non aliis inter se nominibus differunt quàm primi, secundi, tertii, & quarti. Primus nempe dicitur ille qui majorem ferri copiam sinu gerit, secundus qui minorem, qui minorem adhuc tertius, qui tandem minimam quartus nuncupatur. Aperiendi simul & adstringendi facultate singuli polent, eximiamque in profligandis quamplurimis morbis chronicis merentur laudem. Non efficacior ullibi inveneris Medicinam adversùs turpes illas cutis feditates, Tineam, Scabiem, Lepream, Herpetem, Lentiginem, Impetigines; non aliundè tutiora suo infortunio solatia repetent Hypochondriaci; non histericis affectibus valentiora opposueris incantamenta; non arte aliâ pertinaces viscerum infarctus felicius resolveris; non resolutis artibus agendi vim ita certò restituent conjuratæ Pharmacopœorum pixides; non alio potu amissum promptius simul & tutius recuperabunt tonum laxiores ventriculi fibræ; non aliter spes prolis penè desperata major reviviscet; non metuendo minus Sryptico nimia compelles sanguinis aut feminis profluvia; non fluor albus, non pallidi virginum colores, non menses à longo tempore suppressi præstantius in triplici regno obrinent antidotum. Conducunt & in Hydrope, in variis alvi fluxibus, sed præsertim hepatico, in motibus convulsivis, in tremore artuum, in cordis palpitatione, in vomitionibus, in ictero, in asthma, in rheumatismo, in arthritide. Quæ quidem omnia etli fontium vici Passiaci recentiorum

famam ferè cumulent, nullo tamen nomine magis sunt commendabiles quàm quòd ad prophylaxim plurium morborum egregiè conveniant. Minus forsan nota insignis adeo illarum proprietas, sed non certa minus. Et sanè id omne ad præcavendos morbos tanquam aptissimum meritò collaudatur, quod debitum fibrarum elaterem servat, expeditum liquidorum per vasa motum fovet, secretiones atque excretiones promover, appetitum excitat, ingestorum concoctionem juvat, sensus acutiores reddit, verbo cujus ope functiones omnes tum animales, tum vitales, tum naturales alacriter & cum oblectamento exercentur.

## I I.

**D**UPLEX est agentis medici munus; alterum præsentēs curare morbos; alterum futuros antevertere. Quorum posterius etli priori multò sit facilius; utrumque nihilominus parem in medente postulant cognitionum amplitudinem. Quisquis adeo præclaras artes agitare meditatur, non modò alimentorum & medicamentorum vires apprime noscat oportet, sed & inprimis quid sit sanitas, quid morbi, quid illorum causa. Morbus & sanitas totà ab invicem differunt diametro. Alterum est alterius negatio. Sanitatem constituit liber & æquabilis fluidorum per omnia & singula corporis vasa itus ac reditus. Ille tandiu adest, quandiu nec copia, nec defectu, nec lentore, nec tenuitate, nec crassitie, nec acrimonià peccant humores, quandiu vasa illos deferentia bene temperatam obtinent suorum parietum flexibilitatem, ita ut nec se molliùs contrahant, nec vividius præ nimio robore urgeant humores. Ita se habente corporis machinà tum ex parte solidorum, tum ex parte fluidorum, placido & constanti cursu per universas partes deferunt sanguis, laudabiles variis in incerniculis dimittit humores, suum viscera quælibet egregiè absolunt pensum, agilis & expeditus musculis inest vigor, ingestis quantitate respondent egesta, vigent sensus, leniter obrepit somnus, denique totus homo ut ad laborem est promptissimus, sic a labore resurgit alacrior. Cognitā sanitatis causā, contrarium lege noscitur unde suam morbi trahant originem. Varias expende morborum species, illorum scrutare causas. Ibi lentiori passu progredientes succos reperies, ibi penitus moratos offendes, hic vasa occurrent laxiora, flaccidiora, nimio liquorum prementium pondere oppressa; illic canales ultra modum tensi, pertinaciter contracti, fluidis appellentibus transitum negantes aut angustantes. Alibi spissi nimium & sæculenti humores sibimet ipsis viam impediunt; alibi omninò retinenda foras protruduntur; quandoque salsus & pungens humor vasa stimulat & erodit; alias ejicienda aut retinentur prorsus, aut corpori segniùs vale dicunt. Vides in his omnibus toties morborum prædam fieri humanum corpus, quories abnormis sit humorum per vasa motus progressivus. Ista motum in animali œconomia perturbatio, generalis est omnium morborum causa. Adeo multi numero morbi quibus miseri afflictiuntur mortales nomine quidem, non reipsà differunt. Ægrom suffocat Angina, Pleuritis torquet, Phrenitis exagitat, angit ventriculi inflammatio, deturpant Variolæ, febris Petechialis infestat, occæcat Ophthalmia, vexat Nephritis, pungit Hepatitis, intestinorum phlogosis discruciat, Peripneumonia opprimit, urit ardens febris? Idem ubique morbus est, eadem ubique causa, ubique sanguinis adest Stasis in vasculis capillaribus, ubique eandem tragediam ludunt actores iidem; sed diversus ubique scenæ locus est. Non dispar chronicarum passionum ratio est. Ut a communi radice surgunt omnes acuti morbi, nempe a nimia vasorum rigiditate, fibrarum tensione, strictione & spasmò, sic chronici ab earundem atonia, flacciditate & quasi resolutione tanquam ab eadem matre ortum ducunt. Ex hac enim vasorum torpedine subsequitur liquidorum commoratio, quæ pro variis quas occupat sedibus saporibusque alienis quos in humoribus excitat & evolvit cachexiam, hydropem,

scorbutum, luem veneream, affectus cutaneos, varios alvi fluxus, Paralyfes, phthisim, arthritidem, rheumatismum, asthma, histericam passionem, malum hypochondriacum, tumores varios &c. ingenerat. Duos itaque morbos primarios, principales & vere idiopathicos meritò distinxeris atoniam scilicet & spasmodum. Cateri omnes horum sunt effectus & symptomata. Quicquid molliatur medicus curationi morborum additus, nisi excedentem fibrarum elaterem deprimat, aut languentem & quasi sopitum exsuscitet, infelici prorsus successu lentos attenuare humores, inspissare tenuiores, acriores mitigare, catullientes compescere, fugientes retinere, morantes propellere enitetur. Is itaque tantum se veram corpus humanum à morbis vindicandi methodum callere gloriatur, qui totius animalis œconomix mobile primum, alternam nempe valorum systolem & diastolem ita prudenter noverit modulari, ut inoffenso pede vasa singula permeent humores. Et revera quoniam consilio adeo ad tuendam valetudinem commendatur puri aëris inspiratio? quoniam consilio tot circa esculenta & potentia fanciuntur leges, tot circa somnum & vigiliam, tot circa quietem & motum? Cui bono omni ope atque operâ molendam esse excernendorum expulsionem suadet? Cui bono animi pathematibus frænare esse injiciendum præscribitur? eo tantum sine salubres hujusmodi regulas tradit Hygieine, quòd iisdem servatis, servari & expeditum constantemque sanguinis motum à quo pendet sanitas certò sciat.

## I I I.

QUID in fugandis præcavendisque morbis valeant aut non medicati fontes detegere nequiquam contendis, nisi in horum naturam penitiùs introspexeris. Quod ut assequaris, quibusnam illi consent elementis scrupulose est inquirendum. Non levis profecto labor, nec leves suscipienti offert errores debellandos. Vulgaris est medicorum opinio totidem aquis Mineralibus inesse posse corporum species, quot sunt quæ sinu suo recondit Tellus. Hinc dari aquas Auro, Argento, Plumbo, Stanno, Antimonio, Arsenico, Nitro, sale Ammoniaco conditas asserere non verentur. At Chymiam consule. Ab eâ discas nullum aquâ solvi posse metallum, quod peculiari tibi menstruo in sal seu Vitriolum non fuerit priùs conversum. Ab eâ discas nulla aut Auri, aut Argenti, aut Plumbi, aut Stanni, aut Antimonii, aut Arsenici vitriola terraquæ globi visceribus contineri. Ab eâ discas sale Ammoniaco, artibus fortè non naturæ, factas esse non posse naturales aquas. Ab eâ discas Nitrum ex putrefactis tum vegetabilibus, tum animalibus supra terræ superficiem efformatum vim suam salutiferis fontibus impertiri haud quaquam posse. Communis est aquarum mineralium in calidas seu Thermas & frigidas seu Acidulas distinctio. In prioribus sulphur, in posterioribus potens in primis acidum eminere vulgò, sed perperam, contenditur. Solus adhuc inter calidos fontes *Aquisgranensis* Chymix experimentalis sulphur præbuit. Ex frigidorum censu si quosdam exceperis qui nullam aut acidi, aut Alkalini salis notam exhibent, nullus est quem non aequiori jure Alkalinum appellaveris. Nullus quippe est qui instillato Oleo vitrioli non ebulliat: nullus qui tincturas violaceas, in virides eleganti Metamorphosi non permutteret: nullus qui coagulum à Lacte non arceat: nullus qui factâ sui exhalatione, pugnantibus cum acido, cum eoque in salem medium àbeuntes non proferat reliquias. Calidis quoque fontibus inest alkalinum illud principium. Neque ex hac tantum parte sibi conveniunt frigida & Thermales aquæ. Spiritus æthereus, tenuissimus, subtilis admodum indolis utrarumque veluti anima est, mirabilemque his & illis inspirat virtutem. Ochra pariter quædam flavescens seu vera Martialis terra commune utrarumque elementum est. Non aliter ergo disserunt ab invicem Thermae & Acidulae, nisi quòd hæ frigida sint, illæ verò tepentes è suis scatentibus prodeant. Ad frigidarum classem pertinent Aquæ novæ Minerales Passivæ. De illarum contentis variè varia fingunt ad libitum. Alii nitrum, alii terram Calcariam, quidam Gypsum, non-



5

nulli Cuprum iis contineri arbitrantur. In eo consentiunt omnes, ut ferrum tanquam illarum virtutis autorem præcipuum saluent & agnoscant. At quânam sub formâ iisdem inhereat rursum dissentiunt. Illi sub sulphuris nescio cuius martiati, hi sub Martis tenuissimi larvâ delitescere existimant. Verum dixeris si sub vitrioli specie contineri asseras. Sola namque ratio est quâ ferrum pelluciditati aquarum possit non obflare. Præterea non modò gustu styptica sunt & atramentose aquæ novæ Passiacæ (certo vitrioli indicio) sed & purpureum colorem ab insperso Gallarum pulvere induunt, non secus ac vitrioli martis solutionibus accidit. At quonam acido ligatur ferrum in aquis novis Passiacis? Res altius repetenda. Si diutius asser- ventur aquæ nostræ ex limpids turbidæ, ex odoris inodoræ evadunt, pel- liculam splendens iridis more variegatam ad summam sui superficiem emittunt, ferreumque fundo vasis apponunt crassamentum. Si solis æstivi caloribus objiciantur, aut ardenti foco superponantur, multò citius mox dicta mutatio per- agitur, nec sine notabili effervescentiâ, multisque sursum tendentibus bullis acris. Sedato tumultu, ferroque penitus repudiato, aqua iterum sit pellucida, sed tunc quæ leviter tantum falsa est non vitriolica, additoque pulvere Gallarum concolor re- manet. Si distillantur aquæ novæ Passiacæ, nulla liquorem obducit multicolor pel- lícula, sed fibræ aliquot fulgentes aquæ summum obtinent, quæ sensim factæ cras- siores junctæque invicem fundum petunt, ibique veras efformant crystallos. Peractâ distillatione aqua Recipiente contenta saporis odorisque est expers, nec ullâ admix- tione mutabilis. Residuum componunt plures sequenti ordine dispositæ substantiæ. Ferrum utpote gravius Cucurbitæ fundum occupat, hunc proxime excipit pulvis al- bus tenuissimus, cui immediate incumbunt Crystalli splendentes & pellucidæ, quas tandem obtegit massa quædam albicans, gustu salina, humidæ acris contactu facile in deliquium solvenda. Jam vero si aquæ communis assusione id omne ex hac massâ salinâ abstrahatur quod solubile est, liquor percolatus & leni igne ad siccitatem us- que exhalatus, distillationis ope sursum evehit spiritum acidulum, odorem accensi sulphuris exacte referentem, verum denique *spiritum sulphureum volatilem*, qualem ex sale tartari deflagrantis sulphuris vaporibus saturato, simili arte extrahit Stahlus. Absolutâ distillatione pulvis remanet albicans, saporis aliquantulum amari quem si aquâ rursus solum percolaveris, terra alkalina supra chartam bibulam remanet, trajectum autem liquorem exhalando genuinas salis Glauberi crystallos obtine- bis. Quibus semotis & ulterius continuatâ exhalatione, sal prodit figurâ cubicum, gustu salinum, in igne crepitans, verbo ipsissimum sal marinum. Aqua tandem su- perest flavi coloris, tactu pinguis, iteratâ exhalatione intensius coloranda & inspis- sanda, gravem & bituminosum odorem spirans, nullos jam crystallos editura, satu- ratissimâ salis marini solutione olei mineralis compedibus intricatâ constans, à bitumine non aliter liberanda quàm si injectis ovorum albuminibus decoquatur, tunc- que iterum crystallos cubicas datura, instillato oleo vitrioli, spiritus salis subtilissimi vapores emittens, cum eodem distillata verum minerale sulphur efformatura.

Nunc veniunt examinandæ crystalli pellucidæ alterum residui stratum efformantes. Porro has esse sal quoddam compositum seu neutrum quod *Selenites* vocatur, mul- ta demonstrant. Scilicet constantem usque figuram referunt illæ crystalli; leni sed diu continuato igne in aquâ tandem solvuntur; solutioni additæ aliquot olei tartari per deliquium guttulæ maximam terræ copiam dant præcipitem acidis mineralibus facilè iterum solvendam; eadem crystalli in Crucibulo ignito cum pulvere carbonum pro- jectæ & fuscæ, in *hepar Sulphuris* convertuntur; simili modo tractatæ cum Nitro fixo massam produnt quæ calenti aquâ soluta, dein plurimâ quâ turget terrâ percolatione liberata, tandemque exhalata Tartarum dat vitriolatam. Quoad ferrum imam re- sidui partem constituens, etsi primâ fronte rubiginosum appareat, perfectum tamen est omnesque metalli dotes obtinet, Nempe ab acidis cunctis mineralibus solvitur fa-

cillimè, istaque solutio cum pulvere Galliarum nigrescit, nitro fuso superinfectum simul fulgurant, salibus per calcinationem spoliatum Magneti conjungitur. Quod cum ita sit, nullus jam dubitandi locus superest, quin ipsi vitrioli formam conciliet spiritus sulphureus volatilis suprà memoratus, illudque aptissimum reddat ut in Aquis nostris salvà illarum limpidine suspensum detineatur. Quemadmodum autem solutio vitrioli martis vulgaris solà alkalinae cujusvis substantiæ additione turbida fit & lutea, sensimque dimittit ochram flavescens, metallum scilicet quo vitriolum pro parte constabat; ita & mutationes quæ in aquis novis Passiacis tum sponte tractu temporis eveniunt, tum caloris ope in evaporando aut distillando contingunt, non ab aliâ causâ pendent, quam quòd terra quædam alkalina iisdem aquis contenta occurrit tandem acido vitrioli elemento, cum ipso nubit, Martem è suâ sede deturbat, paucis vitriolum destruit. Inde facillimè redditur ratio cur simulac immutatur aqua nostræ oboriatur fermentatio? Cur fiant opacæ? Cur sedatâ fermentatione ferroque penitus delapso amissa redeat pelluciditas? Sed omnis pereat odor saporque vitriolicus. Nec gratis fingi existimes aquas nostras substantiæ alkalinae esse participes. Præterquàm enim quòd tincturæ violarum viridem inducunt colorem, præterquàm quòd lacti admixtæ illud à coagulo vindicant, præterquàm quòd ferum ex solutione vitrioli vulgaris agunt præcipitem; pulvis albicans quem in residuo contineri notavimus terra quædam est tenuissima cum acidis cujuscunque generis fermentescens & speciatim per acidus regni mineralis liquores facillè solvenda; terra itaque est verè absorbens & alkalina.

Ex dictis hæcenus intelligitur aquas novas minerales Passiacas vim suam repetere à contentis in se vitriolo quodam nativo, sale Glauberiano, sale marino, oleo quodam minerali, terrâ alkalina & *Selenitide*. Quæ omnes substantiæ in maximâ aquæ purissimæ copiâ solutæ liquorem constituunt fovendæ sanguinis & humorum per omnia & singula corporis vasa æquabilitati maxime idoneum.

#### I V.

**U**NANIMI Medicorum consensu ita comprobatum est simplicem aquam valetudini tum tuendæ, tum reparandæ esse accommodatam, ut inter eos pauci sint qui Medicinæ universalis titulo hanc jure insigniri posse non fateantur. Et verò quid est quòd argenteus ille liquor mundo coævus, cunctis animantibus ad vitam fovendam ultro concessus à naturâ, non præstet beneficii. Nihil in rerum naturâ Aquæ potu præstantius, sive villos molles flexilesque fingere, sive sanguinem & humores debite fluidos servare opus sit. Aqua sitim sedat, appetitum acuit, alimentorum divisioni in ventriculo egregiè famulatur, ipsorum concoctionem promovet, distributionem juvat: chylum fluidiorem efficit, blandum, dulcem, non ætiosum, non acrem, non irritantem, unde sanguis purissimus facili lapsu per vasa discurrens. Aqua salubritatis vehiculum est quo digestionis reliquæ diluuntur, quo viscidus ac tenax mucus ventriculi & intestinalis tunicas obducens optimè detergitur, quo saliva, succusque gastricus & intestinalis uberiùs cibis admiscetur. Aqua fluidorum præpedit excandescentiam, eadem à morâ, lentore. falsædine præservat; corpori refrigerium præbet, præbet sanguini & humoribus vehiculum quo possint vasculorum tenuissimorum angustias liberè transgredi. Aqua alvum servat mollem ac liquidam, tardiorrem solvit, urinæ vias expedit, easque eluendo & abstergendo calculi coactionem impedit, perspirationem omnium excretionum saluberrimam mirificè adjuvat. Aqua putredinem arcet futuram, serpentem sistit, dolores mulcet, spasmos lenit, dura emollit, laxat tensa, acria involvit, exuperantia in humoribus salia dissolvit, solutæque secum foras abripit. Est denique aquæ tanta salubritas ut Hydropotæ cæteris qui vino aut fermentatis liquoribus indulgent & saniores & longæviores, quin etiam corporis viribus plerumque valentiores sint. Illud quoque animantium exemplo confirmatur, quorum robustissima sicut & debiliora, non alio quàm aquæ potu sitim ex-

tinguunt, interea tamen morbis rariùs tentantur quàm homines. Cùm itaque adeò magna sit simplicis aquæ ad firmandam valetudinem utilitas: quid non ipsi salubritatis accedet ab admixtione corporum quæ seu ad arcendos, seu ad fugandos morbos esse efficacissima usu quotidiano deprehenduntur? qualia sunt sal commune, sal Glauberianum, & vitriolum Martiale. Salis communis adeò eximia virtus est ad tuendam sanitatem, ut ipsum tanquam vitæ suæ tutamen sponte appetant omnis generis animantia. Hinc universale ciborum condimentum est, & meritò quidem; potentissimum enim est putrefactionis antidotum. Cibis itaque permixtum in ventriculo nimiam illorum fermentationem & putrefactionem retundit, vehementioremque cæterorum corporis humorum æstum cohibet. Præterea sanguinem à coagulo præservat, & eundem coccineum ac purpurascentem reddit; fibras motrices & canales excretorios ex iis compositos suis aculeis leviter prorit, efficitque ut non modò sanguinis & humorum celerior fiat progressio, unde partes crassiores atteruntur, & cum fluidis melius permiscantur, sed & ut saluberrimæ secretiones & vitæ perquam necessariorum rerum alienarum excretiones, quarum ope ipsum simul & corpore expellitur feliciùs succedant. Sua quoque sal Glauberiano facultas inest salutifera. Mirabile illud concretum nervæ ventriculi & intestinorum fibras amaritudine suâ leniter titillando famem excitat, sordes quibus primæ viæ inquinantur everrit, sæcibus exitum parat, facilem chylo viam sternit, bilis separationem adjuvat, urinas ciet, &c. Nec minorem sibi ferrum vindicat laudem in negotio tuendæ sanitatis. An ad civiles usus, an ad sanitatem conferat magis utilissimum illud naturæ donum non facile dixeris. Fatiscentem fibrarum tonum erigit, tollit infarctus, abnormes sistit liquidorum effluxus, lentos dividit humores, crassos incidit, tenuiores cogit, vias stringit patentiores, occlusas referat, robur ventriculo cæterisque visceribus conciliat. Vires autem suas imprimis exercet ferrum, cùm solventis acidî ope salis formam obtinuit. Hinc felici adeò cum successu usurpantur tincturæ Martis, Tartarum Martiatum solubile, sal Martis Riverii: quæ totidem sunt verè heroica remedia, sive ad propulsandos, sive ad præcavendos plures chronicos affectus. Verùm enim verò si tantum valeant sales Martiales arte facti, quid non proderit elaboratum à naturâ ferri vitriolum Aquis novis Mineralibus Passiacis contentum. Tantò sanè magis omnia Martis præparata antecellit, quantò subtilius volatiliusque acidum recondit. Ipse enim est *spiritus sulphureus volatilis Stahlianus*, non oleum vulgare vitrioli ponderosissimum; subtilissimus vapor est omnia pervadens, Martem suis alis, ut ita loquar, deferens, ipsumque in minutissimos quosque ductus insinuans. Cogitantibus jam innotescit quàm non iniquo jure inter non negligenda sanitatis præsidia reponantur Aquæ Novæ Passiacæ. Nam præter communes aquæ vulgaris quas retinent virtutes, mox enarratas salis communis, salis Glauberiani, volatilisque Martis vitrioli dotes medicas sinu gerunt. Quibus profectò aptius nihil excogitari potest ut omnes functiones feliciter peragantur; quid enim istud melius & efficacius præstare valet, quàm aquæ leni salino stimulo armata, quæ copioso suo liquido diluunt humores, attenuant, & ad motum aptos reddunt; salinis autem aciebus viscida dissolvunt, & ad id canales sollicitant ut fortius & crebriùs intus contentam molem premant atque protrudant. Minime etiam spernenda virtus est quam ab alkalina terrâ mutantur aquæ nostræ. Inde enim absorbentium more combibendis acidis liquoribus in hypochondriacorum ventriculo genitis perquam idoneæ sunt. Pariter *Selenites* quàm aquæ novæ Passiacæ solutam tenent, easdem fibras quas præterfluendo lambant, sollicitandis aptas, sicque fovendo sanguinis motui progressivo, necnon promovendis excretionibus pares efficit.

V.

**A**QUÆ igitur novæ Minerales Passiacæ plurimi faciendæ sunt à medicis quoties debitum fibrarum tonum tueri, expeditum liquidorum per vasa motum fovere,

excretionēs & secretionēs omnis generis promovere, sanguini fluorem conciliare, appetitum excitare, ciborum concoctionem juvare, sensus reddere acutiores, impedimenta circulationis remove, imminentes denique morbos in cunis jugulare intendunt. Quid non ita tamen est intelligendum, quasi aquarum nostrarum potui obligare se homines sanos & benevalentes jubeamus. Summum ipsis elto & unicum adversus morbos praesidium, genus vitæ varium, legitimusque sex rerum non naturalium usus. Verum ubi fractæ adhucdum à morbo vires, languidaque & debilis fibrarum contractio humorum stagnationi & evolutioni locum præbent, morbosque portendunt quos vocant succedaneos. Tunc ignem cineri suppositum dolo non suffocabis melius penitusque restingues, quàm liberali aquarum vicij Passiaci recentiorum haustu. Hinc recreandis omnibus ferè convalescentibus conveniunt nobiles hujusmodi lymphæ. Sæpiissime evenit ut Asthma aut Empyema Pleuritidem & Peripneumoniam excipiant, Quartanam hydrops, obstructiones Hepatis Lienis Pancreatis Mesenterii Ascites, Apoplexiam Paralytis, Hæmophthysim Phthisis, Asthma hydrops pectoris, febres intermittentes malum hypocondriacum, alvi fluxum Tabes. His malis omnibus felicissime occurre, si relictam à priore morbo debilitatem fibrarum, humorumque lentorem fontium Passiacorum potu castigaveris, Sed quantacumque sit Acidularum quas commendamus excellentia, in iis potandis modus observandus est. Ut enim non medicamenta modò sed & alimenta nullo ordine modoque, & alieno tempore ingesta damni multum, certaque diei horâ, modo & quantitate convenienti, corpore bene ex consilio periti medici præparato bibantur, morbos potiùs valent arcescere quàm arcere. Equidem pro variis subjeetorum temperamento, ætate, viribus, morbis diversimodè à medicis instituendus aquarum nostrarum potus. Quædam tamen circa hanc rem regulæ generales statui possunt, quarum præcipuæ sunt. Ut quantum licet ad ipsam scaturiginem bibantur aquæ, ut jejuno ventriculo & summo manè hauriantur, ut à *Depuratis* aquarum incipiatur potatio, dein ex quarto fonte hauriantur, sicque fiat sensim ad primum usque fontem progressus modò id morbus exegerit; ut primum parvis haustibus & ad duas tantum libras assumantur; ut de die in diem numerosiores & largiores haustus ingerantur; ut à cibis crudis, duris, crassis, salis, fumo induratis & faciliè putrescentibus abstineatur; ut coena sit parcior; ut moderate corpus exerceatur; ut à frigore nimio, à calore immodico, à sudoribus, ab aëre vespertino, à somno diurno, à tristibus animi affectibus, à Baccho & Venere immoderatis caveatur. Hæc si scrupulosè observaveris, nullæ non sunt ab aquis nostris sperandæ utilitates. Felices ergo nimium sua si bona norint Lutetiæ cives; faciliè jam carerent aquis Forgienibus, Spadanis, Vichienfibus, aliisque bene multis, merità sanè laude non defraudandis, incolisque locorum in quibus scaturiunt plurimum commendandis, sed ære multo minimùm conquirendis, cum faciliè parabiles viribusque non inferiores sponte nobis offerat benigna parens natura.

*Ergo ut sanandis, sic & præcavendis pluribus Morbis Aqua nova Minerale Passiacæ.*

Proponebat Parisiis FRANCISCUS - NICOLAUS GAUTIER DU ROCHER;  
Parisiinus, Saluberrimæ Facultatis Medicinæ Parisiensis Baccalaureus,  
A. R. S. H. 1743, à sextâ ad meridiem.